

Gobierno ta haci apelacion na pueblo

Protege e inversion di 5 miyon den Linear Park



GABINETE Mike Eman a traha un plan integral pa Aruba, “BoAruba”, bou di cual tin diferente sub-division, pero e importante di e plan aki t’e meta pa renoba Producto Aruba, tanto pa local como pa bishitante. Un di e proyecto importante ta Linear Park, cu na final lo bira un di e parkenan mas grandi y bunita den Caribe. Durante bishita di Famia Real, pueblo por a mira con bunita e parke aki ta kedando. Dentro di poco lo por mira e prome fase finaliza, cual lo yega te dilanti cas di Gobernador.

Den combersacion cu arquitecto Raffi Kock, kende ta supervisa tur e aspecto di renobacion di Producto Aruba, el a splica cu e contratistanan contrata ta trahando di dia y anochi cu e meta pa finaliza e fase aki prome cu e paradanan grandi di Carnaval na Playa.

El a splica cu riba e area lo no mag pone ningun trailer, pa cual a ordo tent cu lo wordo instala. Ta trata di tentnan masha bunita cu lo tin e logo di Aruba, mustrandó asina e orguyo di

nos hendenan di ta Arubiano.

E tentnan ta bay wordo gehuur n’esnan cu a haya un kavel, pero e ta wordo instala dor di personal di Gobierno. Esaki pa supervisa cu ningun daño ta wordo cometi. Nan lo pasa for di e fietspad y ta coy un pida di e loop-pad.

Raffi Kock a enfatisa cu e prohibicion pa staciona riba e areanan di Linear Park, no ta conta solamente pa temporada di Carnaval. No t’e idea pa staciona riba e acera ni tampoco riba ningun area di Linear Park. P’esaki den futuro lo bay construi areanan special pa staciona. Pues henter e area patras di e fietspad tambe lo ta protegi. Cuerpo Policial su funcionan lo bay ta controlando e area pa chauffeurnan cu ta viola e prohibicion aki.

Mester tene cuenta cu ta trata aki di un inversion di rond di 5 miyon florin, pa embecece Aruba, pa cual ta haci un apelacion na pueblo di Aruba pa protege e area aki. No solamente protege, pero tambe mantene limpi.

